

第一百廿三冊

卷二百三十九

列女傳 一

卷二百四十

列女傳 二

新纂雲南通志

盧漢題

纂



新纂雲南通志卷二百三十九

列女傳一

史記不傳列女劉向始傳之漢書藝文志著錄於儒家范蔚宗遂於後漢書中特立一傳厥後列朝之史皆沿其例然天下之大所傳者不過數十人知其遺漏者多矣向之所傳不止一端有母儀賢明仁智貞順節義辯通孽嬖七類諸史但取有才德者著之不以類分近世郡邑志書雖題列女之名而所志惟節孝貞烈雲南諸志亦然至光緒續修所載共十二卷外有列女錄四冊茲加以採訪又得數千百人知婦女敦禮義尚節烈雖窮鄉僻壤咸有其人益徵教養之隆風化之美也爰盡登簡冊以誌芳規並以義婢附

雲南府一

元

馮文舉妻馬氏光州人隨夫任雲南儒學提舉值明玉珍攻城將陷
文舉謂之曰某受國恩今有死而已爾光州馬中丞孫女也其從之
乎馬曰夫以義死妾生何益遂焚香北拜俱縊於學宮

雍正志

段功妻阿禡光州人梁王女也贅功爲壻功官平章王忌其才欲鴆
之禡知其謀以告功功不信遂遇害禡以死自誓王百計慰之竟不
食死嘗作詩哀功曰吾家住在雁門深一片閒雲到滇海心懸明月
照青天青天不語今三載欲隨明月到蒼山悞我一生踏裏彩吐嚕
吐嚕段阿奴施宗施秀同儂歹雲片波潏不見人押不蘆花顏色改
肉屏獨坐細思量西山鐵立霜瀟灑

梁王母嘉禧明兵破滇梁王同母赴海飲藥不死投水死之

滇載記

梁王妻忽的斤梁王赴海先縊其妃死之

滇載記

驢兒及達德妻某氏二人

滇載記

道光志案德明史作的洪武十四年十二月梁王遣司徒平章達里麻率兵駐曲靖沐英引軍疾趨乘霧抵白石江霧解達里麻望見大驚傳友德等率兵進擊達里麻兵潰被擒先是王以女妻大理會段得功嘗倚其兵力後以疑殺之遂失大理援至是達里麻敗失精甲十餘萬王知事不可爲走晉寧州之忽納岩焚其龍衣驅妻子赴滇池死遂與左丞達的右丞驢兒夜入草舍俱自經云

皇甫璇妻楊氏 桑知州妻李氏 景知縣尹妻王氏皆昆明人以

節旌表

萬曆志

明

李仁山妻楊氏昆明人仁山卒楊年十八生女未逾月翁憐之諷更

嫁楊嗚咽斷一指曰指續可嫁竟不能強洪武間旌

雍正志

嚴士良妻吳氏福建侯官人洪武二十二年隨夫戍滇夫卒氏年二

十撫子守節四十餘年宣德間旌

雍正志

孫彬妻謝氏三吳人彬爲廣南衛軍永樂初挈謝成交趾清化衛生子敬彬卒謝守節久之有詔復安南國歸廣南同戍者強敬遜海而南潛歸吳下謝聞而諭之曰汝父占戍籍汝私還句牒必至自罹罪也且滇吳萬里浮海叵測萬一不諱而葬魚腹汝父其爲若敖之鬼乎乃與敬匿神祠中睨同戍者過盡循故道走間關歸孀居五十餘年壽九十終敬後以軍功授本衛百戶

康熙志

李陽妻黃氏昆明人年二十二而寡守節四十年奏聞旌表

康熙志

盧英妻短氏昆明人英官左衛指揮卒時氏年十九守節終身

雍正志

劉潤妻趙氏昆明人潤官後衛指揮卒時趙年少誓死不二

雍正志

張翊妻胡氏昆明人翊左衛人卒胡斷髮自誓事姑盡孝姑遭疾竭

誠籲天醫藥輒效後以子矩貴受贈

雍正志

嚴可富妻高氏 嚴鎮妻汪氏宜良人高年二十七夫卒堅貞自矢

以女紅給諸子讀書墓祭歸道拾白金八十餘兩訪其主還之子鎮

娶汪氏未幾卒汪亦年二十七生遺腹子容矢志如姑皆壽終鄉人

稱爲嚴氏雙璧後容及容二子範表俱登賢書入仕籍人以爲貞節

之報也大學士李東陽作傳謝遷爲記巡撫都御史王啟爲贊

萬曆志

趙宣妻朱氏昆明人宣左衛人卒時氏年十九誓不再嫁時南寧伯

毛福壽征麓川回滇謀欲娶之氏正色曰必欲相強惟有死耳卒不

能奪守節五十七年

雍正志

道光志案三綱祠
記朱氏作米氏

劉琛妻邱氏楊林所人年二十二夫卒守志不渝撫遺腹子成立成

化間旌

康熙志

鄭儒妻洪氏嵩明人夫弘治戊午舉人計偕卒於京計至屢縊以殉

姑救免守節甘貧與姑同寢食闕不踰衣不彩督課幼子成立

道光志

楊翺妻許氏昆明人翺弘治辛酉舉人卒時氏年二十五誓不再嫁

苦節終身

雲南府志

方玘妻曹氏玘後衛人早卒曹矢志守節以子貴贈夫人旌其門曰

貞節大學士李東陽爲作可貞堂記

雍正志

葉在妻曹氏昆明人夫卒氏即誓以柏舟之操撫子泰於正德辛巳

成進士

三綱祠記

唐錡妻陳氏晉寧人年二十七夫卒家貧無子姑欲奪其志氏泣涕

不從姑病嘗藥姻戚不輕見守節六十年嘉靖間旌

康熙志

羅江妻李氏嵩明人江爲南昌府推官遘危疾氏割股救之不愈及

卒扶柩歸里哀慟喪明適有寇至焚劫一空氏抱夫遺像投水母姊

救免益勵苦節嘉靖間旌

萬曆志

李克明妻楊氏昆明人三十而寡堅志守節訓子向陽茂陽悉成名

向陽嘉靖癸卯舉於鄉茂陽亦舉人任大定知縣見鄉賢

雲南府志

徐昂妻顧氏 徐行妻鄭氏昆明人顧年二十而寡撫子二曰行曰

言行嘉靖丙午舉人官合江教諭卒於任時鄭年二十七守志如姑

後十年先姑而死遺二子曰麒曰麟顧又爲撫之年十餘終御史孫

用表其門曰雙節

康熙志

繆汝恩妻章氏呈貢人汝恩嘉靖庚子舉人卒於京師章撫孤守節

以壽終事聞當道旌獎

參通志雲南府志

劉體仁妻孟氏昆明人體仁官保甯府通判卒於任孟匍匐間關扶

櫬歸葬紡績以供諸子後六子相繼以科名顯文徵順徵信徵尤著

鄉黨賢之

康熙志

陳孟章繼妻田氏安甯人夫任南京戶部主事氏年二十一夫卒號呼欲絕刺面毀形事翁育女守節四十年時易門土官王一心叛聞其美欲劫之以兵圍其家三日氏閉門拔刀欲自刎乃引去

參雍正志
安甯州志

嚴清妻施氏昆明人光祿少卿昱之女屢封夫人端肅整潔樸素無

華理門內之政子弟童僕肅然憚之年八十卒

雲南府志

趙芑女安甯人名淑姐夫姓名失傳女年十四許字未于歸鳳賊之

亂慷慨自誓以衣蔽面投水死詔旌

雍正志

南村烈婦昆明人嘉慶間鳳克之變婦被驅奔竄始猶雜衆人中至

南壩河掩袂投水死

雍正志

蔣志州妻劉氏歸化人年十八夫喪守節事聞當道旌獎

萬曆志

王業元妻許氏祿豐人夫卒貞節自勵阿克之亂恐爲所辱先自刎

死事聞詔入忠節祠

雍正志

閻厚妻金氏昆明人厚郡諸生卒時金年二十二無子號痛幾絕口

鼻流血將屬續復甦遂竭力養繼姑四十餘年以節終

雍正志

案李修通志作關厚

程世勳妻蕭氏世勳後衛人官百戶嘉靖四十五年督師討鳳繼祖之亂歿於陣蕭年十八矢志冰霜孝孀姑李氏撫孤子道南守節五十年終其子道南亦以孝聞

雍正志

段雲彤妻諸氏晉甯人二十二守節隆慶二年知州張四維申詳請

旌云持節旣已有年養姑能執婦道卒年八十四

晉寧州志

李志恭妻王氏呈貢人夫卒二子皆幼有諷氏改適者泣曰吾與二

孤相爲存亡耳後二子皆爲諸生氏以壽終萬曆間旌

康熙志

案李修通志王氏新興州
王退女歸呈貢李志恭

王璽妻李氏安寧人年十九夫卒痛哭求死母知其有遺腹以嗣續

曉之乃止後生女不易其志守節四十年萬曆間旌

雍正志

宋廷相妻梁氏易門人年十八夫卒苦志守節萬曆間旌

雍正志

蕭必達妻任氏晉寧人年二十六夫卒子甫一歲家貧姑老氏紡績

養姑姑歿拮据殯葬苦節五十餘年撫子成立萬曆間旌

雍正志

趙轉妻段氏晉寧人年二十夫卒截髮自誓撫孤養親夫墓碑豫刊

己姓氏以表同穴守節五十八年萬曆間旌

康熙志

胡道明妻王氏晉寧人郛縣令如春女年十九夫卒家貧無子矢志

堅貞孝事翁姑守節六十年萬曆間旌

康熙志

李名奕妻蘇氏晉寧人夫病日久籲天求代藥必親嘗夫卒氏年二十五以死自誓毀容見志翁姑老二子尙在襁褓家貧紡績以給守

節四十九年萬曆間旌

雍正志

楊以學妻趙氏晉寧人年二十八夫卒孝事舅姑撫二子成立鄉里

有孝婦賢母之稱萬曆間督學陳洙給匾旌其門卒年七十二

晉寧州志

李大倫妻劉氏呈貢人夫卒無子氏撫姪延馨舉於鄉歷官知府萬

曆間旌

雲南府志

楊氏女昆明人名齊姑許聘未嫁夫卒守節不二萬曆間有司兩旌

其門

雍正志

良朝元妻郎氏昆明人朝元郡諸生卒時郎年二十撫遺腹子後亦

殤矢志不移紡績自給守節七十年

雍正志

廖忠妻梅氏昆明人年二十四而寡甘貧守節撫二子應和應奎俱

成立

康熙志

孫宙妻浦氏烏撒衛舉人浦仲良女夫昆明人氏從夫宦京師夫以上林左監丞卒於官二子方在襁褓氏翦髮置棺忍死扶櫬歸葬慟哭不食死於墓側

康熙志

周維新妻閔氏昆明人年二十九而寡教諸子誦讀紡績以佐膏火苦節五十餘年臺司旌其門後以子作樂貴封太宜人

康熙志

陽氏女名羅平姐昆明人父應春許字三泊楊東明未于歸而東明卒女聞之哀慟欲死因救得免母欲更字不從自縊死事聞敕建坊

祠祀今永清門內有烈女坊

萬曆志

周允惠妻王氏昆明人年二十九而寡守節至九十九而終萬曆間

旌

康熙志

姜愷妻吳氏昆明人年三十而寡苦志守節萬曆間巡按具題旌表

雍正志

王宓妻時氏昆明人宓病篤以後事囑時誓死相從及宓卒時年二十四勤事舅姑撫育幼女後舅姑相繼歿女適人乃自縊以踐夫未

亡時自誓之言奉題旌表

雍正志

張翹妻胡氏昆明人夫亡遺二子家赤貧氏守節教二子至七十而

終

康熙志

王僕妻段氏昆明人年二十五夫卒子萬年在襁褓養姑教子守節

三十餘年

康熙志

劉悌妻常氏 劉大節妻嚴氏昆明人常年二十六夫卒遺孤甫三月誓不改節以女紅自給名其子曰大節後成立爲諸生娶嚴氏尋卒嚴亦守節如姑克撫其子光祚中崇禎庚午鄉薦人稱劉氏雙節

康熙志

陳梁妻劉氏昆陽人年二十二夫卒人欲奪其志氏誓不從竭力養

翁姑撫子成立年逾八十萬曆間旌

雍正志

封錫類妻王氏昆明人錫類萬曆癸卯鄉薦任浙江壽昌令卒於官王年三十二子皆幼扶櫬歸家甘貧課子後二子成名守節三十七

年而卒

雲南府志

案舊志府志列女門作封錫
履府志選舉門作封錫類

陳爰諷妻王氏昆明人爰諷官吏部主事卒於任王扶櫬旋里道遇

安賊之變罵賊而死年甫十七崇禎十年丁丑子履忠成進士具疏

陳請准建坊旌表

康熙志

幸際時妻張氏羅次人孝事翁姑姑疾備盡辛苦割股以救天啟間

巡按旌獎

雲南府志

魏昇聘妻姓氏失傳昆明人未婚而昇以罪戍騰衝父母謀爲女更
字有成說矣女潛出投水死覓之不得姻家將訟屍尋浮出漁者見

之事乃明

康熙志

秦春妻王氏昆明人年二十二夫卒家貧矢志不二守節四十三年

康熙志

吳鑰妻戴氏昆明人年二十七而寡紡績自給守節終身

康熙志

李光憲妻張氏昆明人二十四夫卒撫遺子養舅姑守節四十餘年

康熙
志

劉傑妻吳氏昆明人傑天啟甲子舉人任河間府青縣學博卒於官

吳年二十八扶櫬歸葬訓子成立守節六十三年

雍正志

施婦楊氏安寧人楊師程女早喪父女始八歲天性至孝事母謹篤天啟癸亥母病醫弗效刲股進湯母病遂愈崇禎己巳母復病氏刲股凡四次及笄適昆明吏部郎中施某子以母病憂患成疾先母死

古今圖
書集成

陳應賢妻董氏安寧人年二十六夫卒子幼家貧紡績佐讀事繼姑

以孝聞歷艱苦五十餘年崇禎間旌

雍正志

吳大穎妻邢氏昆明人崇禎十三年翁國選病篤醫藥不效氏焚香

籲天翁疾尋愈

雲南府志